

# San Juan cartacushan 3

## Tantiyacunanchipaj:

Juan cay cartata isquirbiran yáchänacushan irmänu Gayuman. Payga Washäcuj Jesúsman sumaj yupachicuj. Mayur irmänu cashpan wasinchu jutucuj irmänucunata sumaj ricaj. Yanapaj. Pachächij. Micuyta tarichij. Chaynuy cawashanpita Gayuta allichu jurguran. Chaymi sumaj shacyächinanpaj, anyapanapaj cartacuran.

## Juan isquirbiran:

- Gayuta allichu jurgushanpita, Tayta Diosninchipa shungun munashannuy cawashanpita, irmänucunata yanapashanpita: **3 San Juan 1.1–8.**
- Deótfes jutiuy runa irmänucunata mana yanapashanpita, Juanpa washanta rimashanpita, Deótfesta mana ricacunanpita, Demetrio jutiuy runa alli shungu cashanpita: **3 San Juan 1.9–12.**
- Watucuj aywayta munashanpita: **3 San Juan 1.13–14.**

## Juan wamayashan

<sup>1</sup>Tayta Gayo, nuwa mayur irmänu cashpä cartacallämü. Jamta llapan shungüwan llaquij.

<sup>2</sup>Yáchänacushanchi-janan maquinchu alli cawashayquipita Tayta Diosninchita mañacapuycä ima rurashayquipis alli llucshinanpaj, jishyapis mana charishunayquipaj. <sup>3</sup>Irmänunchicuna watucamar, jampita willamasha: «Tayta Diosninchipa shungun munashanta rurar cawaycan» nir. Chaymi sumaj cushicusheä.

<sup>4</sup>Irmänucuna wawä-yupay cashpan Tayta Diosninchipa maquillanču cawaptin, jatunpa cushicü.

<sup>5</sup>Taytallau Gayo, irmänunchicunata yanapar, allita ruraycanqui. Jucläpita captinsi yanapar, sumaj allita ruraycanqui. <sup>6</sup>Paycuna cayman chayamur irmänunchicunawan jutucar, llaquipäcuj cashayquita willapasha. Sumajshi yanapashanqui paycuna purir mana pishipa-

cunanpaj. Chaynuy yanapaycaptiqui, Tayta Diosninchipis sumaj cushicun. <sup>7</sup>Chay irmänucuna Washäcuj Jesúspa shiminta willapäcur purir-caycan. Tayta Diosninchipa shiminta mana chasquicuj runacunapitam ichanga mana imatapis chasquiparanchu. <sup>8</sup>Chaymi yanapäshuwan Jesúspa shiminta chay-tucuychu willapäcur purinanpaj. Tarichirga, willapäshiyanchi.

## Diotrefeswan Demetriupita rimashan

<sup>9</sup>Juturaj irmänunchicunaman cartacamurä. Diotrefesmi ichanga nishan-nishanta rurar mana chasquicamashachu. Manchäga quiquin allichu llucshiyta munar, pampamanpis churamasha. <sup>10</sup>Shamur, rurashanman-tupu piñacushaj. Payga nuwacunapa washäta rimallar purin. Irmänunchicuna chayaptinpis, mana pachächincho. Pachächiyta munajcunatapis mičan. Waquin irmänunchita jutucuj irmänunchicunapita jargun.

<sup>11</sup>Taytallau Gayo, paypa llupinpa ama jatinquichu. Manchäga allillata ruranqui. Allita rurajcuna Tayta Diosninchipa wawan. Juyucunata rurajmi ichanga Tayta Diosninchi pi cashantapis mana musyanchu.  
<sup>12</sup>Demetriupämi ichanga alli cawashanpita, Tayta Diosninchipa shungun munashannuy cawashanpita lapanpis alli riman. Chaymi nuwacunapis payta alliman jurgü. Pitapis Tayta Diosninchipa shungun munashannuy cawaptin, alliman jurgü.

### Cartapa ushyanan

<sup>13</sup>Willapänajpaj achcaraj caycan. Ichanga isquirbiyllapam llapanta mana isquirbimümanchu.

<sup>14</sup>Manchäga manasi aycällata watucushayquipaj. Tincur, sumaj parlanacushunpaj.

<sup>15</sup>Allilla juyaycullay, ari. Ricsinacushanchicuna wamayäshunqui. Irmänunchicunatapis ninqui: «Wamayäcäshunquish.»  
 Chayllana.